



Ku Fe ta manda brasa

Michèlangelo "MJ" Martina

Kòrsou lanta for di soño, tin speransa pa kosecha
Awor ta ora
Ban pone man na obra
Un dia nobo a habri
Ahe didjo na tur hende

**Ban but'é ku Fe
But'é ku Fe
But'é ku Fe
But'é ku Fe**

Oh ku kinipí di solo
Nos ta lanta yen di speransa
Ku un mente dirigí
Riba progreso di nos pueblo

Apesar di kada reto
Ku presentá den nos kaminda
Nos ta un pueblo luchadó
Trahadó
Yu'i tera persistente
Ku nunca ta doblégá

Awor ta ora
Ban pone man na obra
Un dia nobo a habri
Tin speransa pa kosecha

**But'é ku Fe
But'é ku Fe
But'é ku Fe**

Si ganashi di kunuku
Seú nos fuente di bida
Nos ansestronan a proklamá

**Ta rikesa di un pueblo
i inspirashon
Pa kada bida tin un milager, basta ku nos karga Fe**

Pa plug e tera
Sai Simia
Hisa tapushi na laria gradisí Señor

**Hasié ku Fe
Trave ku Fe
Ban mand'é ku Fe**



Kunuku di bida ta brasa fuerte ta karg'é
Hisa kara na laria yama bendishon di Djo
Supla kachu supla pa nos wapa den union

**Ban mand'é ku Fe
Ban mand'é ku Fe
Ban mand'é ku Fe**

Mané mulina a mula maishi mand'é na bok'i komedó
E trabou por mustra fuerte pero ku Fe nos ta hasié

-Ban but'é ku Fe/But'é ku Fe-

Den nòmber di Djo nos ta bai
Kaya nos ta bai
Ruman awó ta ora
Pa nos sigui avansá
Kòrsou awó t'e ora
Pa nos tera progresá
Dal bo alpargata
Wapa subi kaya
Nos Seú ta rib'e ruta
E ruta di progreso
Hòmber brasa fuerte
Trese bida den kunuku
Damanan balente
Halsa makutu di kosecha
Sigui primi pusha
Ta nos Fe t'e solushon

Basilon

Si bo tambe ta karga Fe
Si bo tambe ke progresá
Awó GRIK sera pa nos

**Hisa bo man bo way'é
Hisa bo man bo way'é
way'é way'é way'é anto wap'é, way'é wap'é**



Ai den nòmber di Djo nos ta bai
Kaya nos ta bai
Hòmber brasa fuerte
Trese bida den kunuku
Damanan balente
Halsa makutu di kosecha
Sigui primi pusha
Ta nos Fe t'e solushon

Final

Mané mulina a mula maishi mand'é na bok'i komedó

E trabou por muestra fuerte pero ku Fe nos ta hasié

Si bo tambe ta karga Fe
Si bo tambe ke progresá
Awó GRIK sera pa nos

**Hisa bo man bo way'é
Hisa bo man bo way'é
way'é way'é way'é anto wap'é, way'é wap'é**

Ai den nòmber di Djo nos ta bai

Ban but'é ku Fe, Ban mand'é ku Fe!



Splikashon

Fe ta algu importante pa karga den bida. Tur loke nos proponé nos mes pa hasi, ta e ta e energia ku ta pusha nos pa hasi esaki. E simpel konfiansa i konvikshon ku tur kos ta posibel basta nos ta sigur di nos mes i di otronan lo materialisá loke nos ta manifestá. ‘Fe ta manda brasa’ ta para pa e Fe ku nos mester tin den propósito ku nos ta lanta tur dia kuné, esta lanta determiná pa traha na bienestar di nos Kòrsou. Kada profeshon den bida ta bini ku su retonan ku tin biaha por demotivá nos pero si nos kambia nos pensamentu i mira e retonan komo un oportunitat. Nan por kombertí den bentaha na fabor di nos propio desaroyo i konosementu. No solamente komo hende pero tambe komo pais. Ta brasa fuerte nos mester tin pa pone man obra i hiba nos pais dilanti. Ta hòmbènan brasa fuerte ta pèrkurá pa trese bida den kunuku, pa damanan fuerte i balente halsa i karga makutu di kosecha pa hiba mangasina. E union den forsa aki lo sòru pa progreso kontinuo di nos nashon.

● **Ahe Didjo** → Un saludo. Didjo ta nifiká: dia pa Dios.

● **ku kinipí di solo**

→ Na momento ku dia kuminsá habri, nos ta mira klaridat i sinti e promé rayonan di solo.

● **Doblegá** → Entregá.

● **Ganashi di kunuku ta rikesa di un pueblo**

→ Tur loke nos planta i kosechá den kunuku ta konsiderá ganashi pa kunuku. Tambe loke esakinan ta generá pero na mes momento kombertí den rikesa pa nos pueblo ya ku nan ta loke nos propio tera a produsí.



- **Seú ta nos Fuente di bida i inspirashon**

→ Seú ta yena nos ku bida. Seú ta inspirá i motivá nos pa sigui kere den nos mes, sigui pone man na obra pa produsí loke nos por for di nos propio tera.

- **Nos ansestronan a proklamá, pa kada bida tin un milager basta ku nos karga Fe**

→ Nos ansestronan ta nos antepasadonan di generashon promé ku nos. Personanan yen di sabiduria di bida ku a traspasá nan konosementu na generashonnan despues di nan. Nos ansestronan a indiká ku semper tin un milager ta sosodé basta ku nos ta kere aden i karga Fe.

- **Kunuku di bida ta brasa fuerte ta karg'e**

→ Den kunuku tin personanan fuerte pa hasi trabounan nesesario ku aunke hopi biaha ta duru mester ta kumplí. Meskos den bida mester tuma sierto desishonnan ku ta eksigí kurashi i determinashon.

- **Mané mulina a mula maishi mand'e na bok'i komedó, e trabou por muestra fuerte pero ku Fe nos ta hasié**

→ Ta usa mulina di man pa mula maishi. E ta un trabou ku ta eksigí forsa den brasa pa hasi esaki. E trabou por muestra fuerte pero e persona responsabel pa esaki ta hasié ku fe pasó e sa kua ta e meta di e trabou, esta sisti stoma di e komedó.

- **Hòmber brasa fuerte trese bida den kunuku, damanan balente halsa makutu di kosecha**

→ Den kunuku tin diferente trabou ku mester hasi. Hopi biaha e kabayeronan fuerte ta esnan ku ta hasi e trabounan mas pisá ku tin komo meta pa yega na kosecha, pues nan ta trese bida den kunuku pa na final nos damanan balente karga nan makutu yen di kosecha.